



廣福廟志

和 9
1094



門又和

第
卷

8094

淡
福

廣 廟
福 出

光緒三年歲次
丁丑夏六月刊

廣福廟志

欽定大清會典 二則

宋賜廣福廟額封侯勅牒

閩浙總督阿
浙江巡撫清 題請 加封疏

禮部移照議 封原奏

禮部頒發 封號咨文

正乙真人府牌

正乙真人承行 敕文

仁和縣勒石 永禁示

咸淳臨安志

廣福廟志目錄



成化杭州府志

萬曆杭州府志

康熙仁和縣志

勅修浙江通志

乾隆杭州府志

蔣侯傳 胡長孺

鹽橋廣福廟蔣侯傳 田純

重建廣福廟記 徐一夔

鹽橋廣福廟蔣侯碑記 潘寔

重建蔣侯碑記 陳宋

廣福廟三殿靈神記 周壽

鹽橋廣福廟碑記 林璐

三蔣侯祠記 馮景

重建鹽橋蔣侯廟碑 缺名

鹽橋廣福廟記 沈佳

重建鹽橋廣福廟記 趙沈壘

蔣侯廟記 邵必昌

鹽橋廣福廟碑記 王曾祥 又梁同書後識

廣福祖廟鹽橋廣福廟社神蔣侯記 林繼善

鹽橋廣福廟記 鍾鏞

廣福廟記 費丙章

恭頌鹽橋社福蔣侯歌詩 厲珩

重修蔣侯墓記 秦瀛

彙刻廣福廟碑記說 張琪

鹽橋廣福廟社神蔣侯傳記誌言 葉維新

鹽橋廣福社蔣侯碑記書後 高烈

讀鹽橋廣福廟蔣侯碑記書後 徐林

鹽橋廣福廟蔣侯碑記書後 高瀛洲

廣福廟紀事 唐恆九

欽定大清會典卷二十九


凡各省之列於祀典者護國佑民則以祀

廣濟孚順侯 利濟孚惠侯 靈應孚佑侯祭

於仁和縣為宋時蔣氏兄弟三人長名崇仁次

崇義崇信守土官春秋致祭以羊一豕一行三

跪九叩禮



欽定大清會典事例卷三百六十二

直省禦災捍患諸神祠廟

嘉慶十一年

敕封孚順侯為廣濟孚順侯孚惠侯為利濟孚惠侯

孚佑侯為靈應孚佑侯廟祀浙江仁和縣謹案

蔣姓兄弟三人長名崇仁次名崇義次名崇信皆仗義樂施民立廟祀之宋咸淳初賜廟額曰廣福封崇仁孚順侯崇義孚惠侯崇信孚佑侯至是奏准加封號



宋賜廣福廟額封侯勅牒



中書門下尚書省送到禮部狀准中書省章奏房付
 下兩浙運司奏本司據臨安府申據仁和縣申本縣
 近據武學閱禮齋學生楊道昭等連名狀乞將蔣相
 公土地廟賜額封號事本縣遂牒右三廂吳義保狀
 申除已將帶廂巡人等分投蔣土地廟喚集鄰右卜
 四王二供稱並與蔣相公為鄰年深係右三廂界鹽
 橋上蓋廟其蔣土地舊居卻與卜四等居住相近右
 三廂界興德坊巷兄弟三人七郎名崇仁次八郎名
 崇義次九郎名崇信七郎妻秦氏子名繼芳八郎妻

廣而厚志 五
鄭氏子名繼善九郎妻衛氏子名繼美佐神張判官
朱三者合府居民及官員炷香求籤無不感應卜四
等自幼年見父母說祖公嘗言蔣土地在日每遇秋
成多積米穀卻於歉歲只照原價出糶以濟飢民一
府之民皆喚爲蔣自量又於宣和間曾糾率義民爲
國拒寇死後現夢於衆鄰人家說道感得城隍司牒
我爲本坊土地緣此鄰衆捨錢蓋廟保護鄉井居民
嘉熙丁酉年府城大火將及鹽橋當時橋上忽然現
出蔣相公旗號其火便息後來城中火燒神像出現
雲端其火又息另有一年大旱官司祈禱不應府主

夢中見說可用蔣自量名祈雨果然感應民戶皆稱
爲蔣相公今蒙取問所供是實如虛甘罪就責鄰右
卜四等罪狀保明是實申本府乞施行本府帖委錢
塘縣鄭縣丞親詣廟所查勘委有上項靈跡保明申
府本府保明申本司本司檢准淳祐令諸道釋神祠
祈禱靈應凡惠利及民載在祀典者宜加官爵封號
廟額本府具事狀保明申轉運司委官躬親詢究再
委別州不干礙官覈實訖具事實跡奏本司遂牒鄰
郡安吉州委官一員躬親前去地所詢究保明申覆
次據安吉州申帖委德清縣茅主簿躬親前去詢究

靈跡因依據茅主簿申繼卽前去地所詢究據武學
闕禮齋學生楊道昭等連名狀稱嘗謂東坡撰韓文
公廟碑有曰其生也有自來其逝也有所爲益信夫
凡有忠義之氣者雖死後數百載凜凜猶生也竊見
本府仁和縣右三廂界鹽橋上有蔣氏兄弟三人長
七郎名崇仁次八郎名崇義次九郎名崇信其先世
蓋吳人也祖父俱有隱德以力耕致富居興德坊今
名七郎堂巷因神稱也每秋成廣糴米穀至歉歲只
照原價出糴以濟飢民凡來告糴者許其自量故以
蔣自量稱之宣和年間方臘陷杭州蔣氏兄弟父子

相率毀家以紓國難拒寇於東隅之赭山寇不敢犯
其境寇平部使者上其功於朝未及錄而殁人皆義
之此蔣氏一門生前有可紀者也旣歿之後一夕現
夢於鄰家謂上帝以我有糴濟人功行牒城隍司差
爲本坊土地民未盡信次夕得夢者數家其說如出
一口土人乃卽舊室立祠以祀之復立廟橋頂禱者
如市京尹韓彥質過而訝之以爲淫祠命撤之及回
府有門卒僵而立府堂皆稱蔣相公來京尹異之立
命仍廟橋頂合府知有蔣相公廟其佐神張判官朱
三者靈感尤異凡民間水旱疾疫禱無不應有不遠

千里而來者往歲旱魃爲虐郡邑遍禱罔功府尹夢黃衣告曰只如此祈求決無感應須用蔣自量名禱之方可得雨尹如其言果雨嘉熙丁酉杭城火災自薦橋將至鹽橋忽有蔣相公旗號見者驚駭未幾焰熄去年閏五月丙火自西南巽風所煽直抵橋側須臾祠上有雲氣神象隱隱現雲端回風止燎今三尺童子皆能言之丙戌歲江潮嚙岸沿江之民奔走乞靈者無虛日潮勢遂回得免漂蕩者十之七八民德之織黃旛以謝神貺此則蔣氏一門死後有可紀者也伏覩明禋大禮赦文一應神祠聖跡及會祈禱去

處有合該廟額及封號者許本路監司依條保奏取旨今蔣氏一門七郎崇仁妻秦氏子繼芳八郎崇義妻鄭氏子繼善九郎崇信妻衛氏子繼美及佐神張判官朱三者其生也能感動天地其死也又能福庇一方可謂能禦大災捍大患者經今百餘年尙不能與典祀之列蒙神之賜者豈得辭其責耶用敢闔詞乞備申施行所據供述保明是實申本州本州保明詣實申本司本司遂牒嘉興府委官一員前去地所覈實據嘉興府申本府帖委崇德縣牛縣丞躬親前去地所覈實次據牛縣丞申繼卽前去臨安府右三

廂界鹽橋蔣土地廟前喚集鄰人潘永年等對衆供述委有前項靈跡保明申府乞備申施行本府保明詣實申本司本司保明詣實謹錄奏聞伏候勅旨又禮部爲臨安府仁和縣三廂鹽橋蔣土地廟神靈跡乞賜額封號事本部除已送太常寺勘當申去後今據太常寺申本寺照得奏內已依條差官詢究覈實保奏應得加封條令勘當伏乞省部備申朝廷如從兩浙運司保奏至事理候批令狀下部行下本寺以憑擬封施行右本部所准章奏房付下前項事理并太常寺勘當申至因依並備錄前項事理取自朝廷

指揮施行謹連奏狀申都省復批送禮部下寺今據太常寺檢准建炎三年正月例神祠遇有靈應卽先賜額次封侯每加二字又淳熙十四年六月例今後神祠祈禱應驗令本路運司依條保奏取旨加封本寺遵從省部併都省批送擬賜廣福爲額加封孚順侯孚惠侯孚佑侯合行降勅所合備申右本部所准都省批下事理併太常寺擬申至因依謹連批狀具申伏候指揮奉聖旨依奉勅如右

咸淳四年二月十八日



閩浙總督阿
浙江巡撫清

題請

加封疏

題為敬陳神蹟懇請具
題

欽加封號事據布政使崇祿詳據杭州府知府廣善
詳據仁和縣知縣巴哈布詳稱據紳耆孫蘭枝
樂鳴山梁紳書吳聚榮等呈稱竊惟杭俗塵賈
民多湖田地薄仰川廣以粒食視糶糶為豐歉
嘉慶九年市運不繼民食拮据鄉民奔禱於鹽
橋廣福廟之神郊原見靈馬之跡廟庭聞際叱
之聲苦雨遂晴禾苗忽活從荆襄販米者皆云

廣福廟志
十一
夢神巾袍麾風順帆遺運旬日海陵之粟三吳
萬斛之舟客賈雲來市價潮落是年湖田有收
民賦不欠皆沐神庥咸知靈佑伏考神兄弟三
人義門一姓忠於有宋退賊在宣和之年祀於
臨安封爵在咸淳之際拒方臘發義廩旣奮義
勇於當時足糧食禦旱澇更効神靈於

聖世爲此敬檢事實碑文出具切結準豐年祈報之
忱允循例申請之情呈請轉詳

題請

封號以光祀典以昭靈貺等情到縣據此該仁和

縣知縣巴哈布查勘得鹽橋廣福廟之神係宋
宣和閒蔣氏兄弟三人長崇仁次崇義三崇信
一介布衣三荆樹德值花石綱騷擾之日鴻易
鳴哀覩禁廂軍游食之繁瓶虞告罄爰倣常平
而爲入爲出號自量而如取如攜且處常則仁
化於鄉知名畏彥方之里臨變則義形於色毀
家紓睦寇之危此懿行無愧於生前而立祠更
靈於身後粵稽淳熙歲旱書名雨降於黃衣洎
乎寶慶江災禱廟潮回於白馬他如追逃而金
獲市上火滅而幟見雲端耳熟能詳於今尤烈

往歲青黃不接巾袍入夢促荆湘待哺之舟雨
水過多圭鬯祈晴免湖嘉下田之澇由近及遠
自昔至今緬厥神靈不可殫述伏考廟垂有宋
賜名廣福謚有孚順孚惠孚佑之崇神之生平
樂善一門無忝立德立功立言之義所以聞其
風者懦立頑廉蒙其庥者家給人足固宜屢豐
祈報用創百世之祀於咸淳抑思至治馨香還
冀一字之榮於

聖世茲據該里紳耆孫蘭枝樂鳴山等同事實碑文
具結呈請轉詳請加

勅封前來卑職伏查凡有禦災捍患保衛民生者例
得仰邀

封典茲鹽橋里廟蔣侯靈蹟顯著口碑載道委係
保障民瘼澤及羣黎查稽志載事實信而有徵
復加查詢前項靈蹟實衆所共聞共見並無虛
捏相應加具印結並同事實詳送察轉到府據
此該杭州府知府廣善核看得仁和縣鹽橋廣
福廟之神生當南宋祖籍西谿作賈成家販糧
爲業同懷兄弟數協函三行義鄉閭名推第一
其時歲歉糶糴法準乎常平厥土民貧施濟功

同乎保障况處宣和之末季正值睦寇之方張
侯乃躬豎義旗力全鄉井奮三刻踰溝之勇矢
一心衛國之忱懿蹟備詳於誌載靈麻疊著於
今茲至於往歲浙西偏災大府漢南告糴民禱
於侯而昭靈貺民感於侯而頌口碑久垂祀典
尊崇更冀

榮封優錫茲據該縣查明事實加結具詳前來覆
查無異理合加結詳請察轉等情到司據此該
本司布政使崇祿核看得仁和縣鹽橋廣福廟
之神長名崇仁次崇義三崇信宋宣和閒人肇

自西溪越遷馨德博施濟衆不居施濟之名捍
患禦災偏卻捍禦之績有如糴貴糶賤寓公平
於貿易之中集義興師退暴寇於縱橫之日力
排薦舉豈以名節自矜隲貺遺言惟冀孔懷克
繼兄先弟後里民無荒歉之憂身沒名傳朝亡
錫封侯之典爾乃黃衣入夢甘霖忽沛於書名
靈爽式憑回祿潛消於幟號望江潮之洶湧普
救沈淪躡奸宄之逋逃用彰正直粵稽碑誌信
而有徵採訪羣言美尤非溢往者浙西歲歉田
畷咨嗟水潦頻仍窮氓告急忽覩雲車風馬麗

日舒長白粒黃珠順帆攬運凡茲士庶咸被神
麻應請

勅封以崇祀典茲據該縣府呈送事實加結具詳前
來相應轉詳察核

題請

加封等情到臣據此該臣看得仁和縣鹽橋廣福
廟之神係宋宣和閒蔣氏兄弟三人長崇仁次
崇義崇信昆季聯翩胸襟磊落託業齊民之術
存心濟物之仁循常平義社之規粒食充而野
無肅羽拒烏合狼嗥之寇烽烟息而人免枕戈

此生平懿美之可稱且身後英靈之足紀祝融
避路橋前之闐闐無驚羅刹迴瀾江上之蓬茅
如故五百年祈晴禱雨同枹鼓以應聲萬千輩
薦藻羞繁望廟庭而接踵雖躬桓之懋爵已錫
於前朝而華袞之榮褒猶冀於

聖世懇加

封號俾慰輿情茲據布政使崇祿轉據府縣查明
事實冊結詳請具

題前來臣覆查無異除冊結送部外臣謹會同閩
浙總督臣阿林保合詞具

題伏乞

皇上睿鑒勅部議覆施行謹

題請

旨

Blank area for the main text of the document, containing faint bleed-through from the reverse side.

禮部移照議 封原奏

禮部為移照事祠祭司案呈本部具

奏為遵

旨議奏事禮科鈔出浙江巡撫清安泰等

題請仁和縣鹽橋廣福廟神

勅加封號一疏嘉慶十一年十一月十九日

旨該部議奏欽此臣等議得該撫等

題稱云臣等謹查定例各省廟祀果有庇佑保

障之功由該督撫查明具

題請

廣福廟志 卷三
旨給與封號今據浙江巡撫清安泰等疏稱仁和縣
鹽橋舊有宋時廣福廟神蔣氏兄弟三人歷著
靈異嘉慶九年市糧不繼民禱於神禾苗暢茂
市價漸落是年湖田有獲咸被神庥等語臣等
考之浙江通志載蔣崇仁仗義樂施做常平法
以家實糴穀賤糶以資生計其弟崇義崇信亦
承兄志行之六七十年里人立廟祀之咸淳初
賜廟額曰廣福封崇仁孚順侯崇義孚惠侯崇
信孚佑侯是神好施樂善已膺褒錫於前宋更
効靈庥於

盛世應如該撫等所請

勅加封號以答靈佑而順輿情如蒙

俞允俟

命下之日臣部移交內閣於舊有各封號之上撰擬


加封字樣進

呈恭候

欽定臣部遵奉施行謹

奏請

旨



禮部頒發 封號咨文

禮部為頒發事祠祭司案呈先經本部議覆浙

江巡撫清

題仁和縣鹽橋廣福廟神請

旨錫加封號一疏於嘉慶十二年正月初二日具

奏本日奉

旨依議欽此隨經本部抄錄原

奏移咨該撫並移會內閣撰擬

封號去後今准內閣交出

孚順侯奉

硃筆圈出廣濟孚順侯

孚惠侯奉

硃筆圈出利濟孚惠侯

孚佑侯奉

硃筆圈出靈應孚佑侯欽此到部相應移咨該撫欽遵辦理可也

正乙真人府牌

襲封正乙嗣教大真人府張 札仰浙江杭州

府道紀司俞九思遵照茲因本府遵

旨朝覲案准

禮部咨開為轉牒事曾於嘉慶十二年閒仁和縣鹽橋廣福廟該里紳士檢考志乘列陳神蹟籲聞上告具結呈請詳題送部祠祭司案呈本部具奏請加

徽謚奉

旨敕部議覆欽此隨經本部鈔錄原奏移會內閣撰

擬

封號字樣進

呈恭候

欽定遵奉施行奉

旨依議欽此經准內閣交出封號奉

硃筆圈出加封廣濟利濟靈應字樣欽此頒發給與

該撫欽遵辦理去後今奉前因律循轉達應邀

晉牒封典以答靈佑咨會前來本府例應彙核

撰擬謹具拜表轉達上

奏恭詩

敕命褒錫優封除遵照外合飭諭仰諭到該道紀司

遵卽確查事蹟並原領

部發頒給

詔冊候本府奉

旨回山迅速抵浙呈送稟覆並諭廣福廟衿耆人等

知悉預應謹備

典禮事宜妥辦虔肅伺候恭迎

天章丹詔下頒例應遣委該員恭賚

玉牘金書至殿敬謹宣讀以先大典均各凜遵該司

仍將頒領日期造冊申報毋違須知內單 右

龍章寵錫邀

殊恩於

北闕司保障於武林茲授爾為總領漕務兼轄水利
仍服原謚例晉王銜於戲萬古英靈千秋正氣
神德普施物阜財豐懋德殊勳與吳山而並峙
威聲赫濯隨越水以同長永享蒸嘗呵護黎庶
故敕

廣濟孚順王

利濟孚惠王

靈應孚佑王

嘉慶十四年五月 日

襲封正乙嗣教五十九代大真人 臣張鈺承詔
奉行

仁和縣勒石永禁示

錢塘縣勒石永禁示
特調杭州府仁和縣正堂加六級紀錄十二次曹

鈔奉

特調杭州府正堂加六級紀錄十二次吳憲

牌奉


欽命浙江督理糧儲漕務道加五級紀錄十次蘇

為勒石永禁事據紳士張鑒孫蘭枝倪彤書王

冕等呈稱仁邑鹽橋廣福廟供奉

欽敕廣濟孚順王蔣神聖像默佑漕儲奠安水利嘉

慶十二年間奉



前撫憲清 題請奉

旨欽加徽謚復於嘉慶十四年奉


五十九代大真人張臨浙採訪奏晉王階嗣於
嘉慶十八年奉

前撫憲李 題請春秋祭祀節奉褒崇理宜虔
潔以昭靈爽今後殿臨暉閣重建聿新誠恐地
保無知每於冬閒引領巡員採作公館未免跟
隨人役經年累月滋擾廟庭更恐無藉棍徒捏
堆物件三五成羣坐臥糟蹋種種不法均干嚴
禁等情據此除出示禁外合行轉飭爲此仰府

縣官吏迅卽一體嚴禁并勒石永行禁止如有
前項玩保引領巡員住宿以及地匪糟蹋等事
許住持人等立卽稟明該地方官詳明究辦其
分段巡員亦宜自愛毋得任聽地保縱役擾累
大千未便等因奉此除曉禁外會行遵飭勒石
爲此示諭四民人等一體遵奉

憲飭嗣後毋許滋擾廟庭勒採公館如敢抗違
立卽稟縣詳明究辦其各凜遵毋違特示
嘉慶二十二年四月 日給奉

憲勒石永禁



咸淳臨安志

廣福廟在鹽橋神姓蔣世爲杭人生建炎閒樂賑施
每秋成糴穀預儲貴則賤糶如元價歲歉或捐以予
飢者死之日屬其二弟曰須存仁心力行好事里人
相與祠其像以報人心所趨靈應如響祈卜者肩相
摩咸淳初賜廟額曰廣福六年安撫潛說友請於朝
封神及其二弟皆列侯曰孚順孚惠孚佑

成化杭州府志

嘉靖仁和縣志文同

廣福廟在惠濟橋神姓蔣名崇仁杭人世居興德坊
喜賑施每秋成糴穀預儲貴則賤糶如原價仍許糶

廣福廟志 三十四
者自量歲歉或捐以予飢者死之日屬二弟曰爲人
須存仁心力行好事里人相與祠其像以報之人心
所趨靈應如響咸淳初賜廟額曰廣福六年安撫潛
說友請於朝封神及其二弟皆列侯曰孚順曰孚惠
曰孚佑廟屢燬於火而鄉人屢新之焉石塘胡長孺
作傳天台徐一夔撰重建記

萬曆杭州府志

廣福廟在鹽橋上祀宋蔣崇仁崇仁世居杭之興德
坊喜施賑卒之日里人祠其像以報之咸淳初賜額
六年朝命錫封及二弟皆列侯廟屢燬於火而里人

屢新之兩浙轉運司長山鹽司丞胡長孺有傳

康熙仁和縣志

廣福廟在鹽橋上祀蔣崇仁胡長孺有傳天台徐一
夔撰重建記康熙十二年廟災庚申復建林璐爲記
勅修浙江通志

廣福廟在鹽橋上祀蔣崇仁崇仁仗義樂施倣常平
法以家資糴穀賤糶以救貧者其弟崇義崇信亦承
兄志行之六七十年里人立祠祀之咸淳初京尹潛
說友請於朝賜廟額曰廣福封崇仁孚順侯崇義孚
惠侯崇信孚佑侯

西湖遊覽志

廣福廟志
乾隆杭州府志

廣福廟在鹽橋上祀宋蔣崇仁崇仁世居興德坊喜
施賑傲常平法以家資糴穀賤糶以救貧者其弟崇
義崇信亦承兄志行之里人立祠祀之咸淳初京尹
潛說友請於朝賜廟額六年封崇仁孚順侯崇義孚
惠侯崇信孚佑侯廟屢燬里人屢新之

蔣侯傳

元胡長孺

虎林城北東陬巍然石梁駕大河上爲鹽橋民間食
鹽由江來舟載至是攜去以是得名橋頭北橫柵木
其下而立屋其上爲廣福廟七十楹門南向士女祠
者爭道出入常擁溢橋東西四十餘丈不得行橋旁
民沽酒作資餌鬻寓馬象泉二三十家他祠蓋莫及
按地志孚順侯蔣氏世杭人生宋建炎閒喜賑施穀
成熟時糴儲價貴用糴價賤糶予人不熟捐予飢者
自幼逮老不變告二弟存仁心力行好事語已卒人
相與立祠侯家後一百三十一年當咸淳三年臨安

尹潛說友以武學生蔣文明若干人之請奏錫廟名
廣福六年尹爲侯暨二弟請賜爵皆列侯尙書祠部
考行庸定號曰孚順侯孚惠侯孚佑侯淳熙閒又爲
祠鹽橋東北尹韓彥質過杭命民羣趨聚壞祠卽日
侯降尹治憑老兵辯數甚力彥質愧謝爲徙橋上今
廟韓所徙也故老相傳不得侯名字獨記其昆弟之
次爲七郎當侯糴糶時使人槩各中其意因號侯自
量廟未錫名之歲有劉宗申晉之者暴戾士也以縱
橫說游蜀荆江淮及爲吳淵潛李曾伯馬光祖客嘗
仕邊攝資州守怨曾伯子知衡州事杓以杓反告密

下杓亡反狀得他罪致死父納官以贖猶除杓名劉
借七寶寺館焉買妾置券盛陳金銀器飲食妾父若
牙僧夸示多藏奴薛榮刺知藏處夜懷刃入劉臥中
殺劉擇取藏物逃去捕急尹矢侯曰三日不獲榮夷
廟毀像榮持錢卜崇德市而獲榮逃常彷彿見邏人
從而後以故不能去其自疑若有躡之者然也相傳
神怪事甚多獨詳著劉事顛末蓋其事可爲世戒
胡先生曰前此四十四年長孺在虎林聞故老誦說
趙忠惠公爲臨安尹會城中見日食文思院斛米
三千石常籍北關天宗水門米船入四千石賤二千

石貴與日食適相若價固等俟之無不中者爲平糴
倉二十八廩鹽橋北糴湖秀蘇常州米置碓房春治
精善歲六十萬石視米船入不及日食輒取賤價與
民消折本錢鉅萬竟尹去十三年米價不翔民不食
糲惡駟僧不罹刑辟噫良尹哉長孺之母實忠惠姪
女忠惠薨長孺九歲七歲時見公建康府治眉目清
峻如圖畫中古偉人顧彥今日籍除去米來與故時
亡懸殊若牧守大倣忠惠時規模民亦倣孚順昆弟
飢歲尙使弗知况平歲邪

鹽橋廣福廟蔣侯傳

蔣侯諱崇仁逸其字杭州人也行第七人呼爲蔣七
郎其先世居西溪村中皆蔣氏故名蔣邨侯祖父俱
有隱德當宋時以力耕致富徙居郭內興德坊今其
巷名七郎堂巷因侯稱也侯生於是坊性醇厚自幼
喜賑施弟八郎曰崇義九郎曰崇信亦能與侯惇孝
友州里稱之宣和二年方臘作亂陷睦衢歙等州隨
寇杭侯督家人捍禦并散資財募義士相與力拒於
赭山之陽賊不敢犯境杭人賴以保全寇平有欲上
其功者侯止曰我爲國家效絲力爾敢他望哉羣議

乃寢建炎初高宗南渡都臨安居民闐盜食米易價
興德坊近鹽橋橋下舟航往來運河如噎其境尤屬
衝繁侯預籌備荒之策乃倣常平倉法於每歲秋成
時廣糴米穀困貯於七寶寺巷遇歲歉則以初價糴
之秋毫無所羨凡有告糴者計所鬻錢償之數任其
自持槩人或過取歸而較之適如其直詫以爲神由
是衆莫敢欺故有蔣自量之稱若歲大歉且爲淖糜
以活飢民遠近獲濟者不可以數計平時與鄉鄰處
通緩急致殷勤酬酢讌會率循禮讓於是闔境化之
庶幾仁里云侯將卒語二弟曰爲人須存仁心行好

事以垂騰貺以布悠遠言訖遂終其後崇義崇信皆
承侯志踵行平糴之事兄弟相繼爲善者通計六十
餘年侯歿之日民間奔走號泣若失所依侯感夢於
鄰曰上帝以我有濟人功行牒城隍司俾爲本坊土
地民未盡信次夕得夢者數家言之如出一口里人
亦不忘舊德乃卽侯故居祠焉私奉神號曰蔣相公
淳熙閒更立廟於鹽橋東北其舊祠易名祖廟自爾
祈禱新廟者或以香炬或以牲醴擊拳曲踞逕至如
市京尹韓彥質過而訝之以爲淫祠命壞之卽日侯
降尹治馮老卒僵仆復起立而神言願徙廟橋南見

者羣稱蔣相公來彥質悚異立命跨橋爲廟仍其祀
頃之值歲旱郡邑遍祈罔功府尹夢黃衣人告曰徒
爾必無驗惟以蔣自量名禱之可得雨尹如其言果
雨寶慶中江湖嚙岸沿江民禱於侯廟潮勢輒殺獲
免漂蕩者什七八嘉熙丁酉臨安大火漸逼鹽橋忽
有蔣相公幟號出見雲端衆目驚駭未幾焰熄咸淳
初火發橋之西南爲風所煽直抵橋側俄祠上有雲
氣隱隱見侯像風回燎止時有豪客劉宗申僦居七
寶寺嘗銜其貲其奴薛榮心豔之乃刺劉竊藏以逃
捕急尹矢侯曰三日不獲榮將夷廟毀像榮至崇德


市髣髴見邏人躡於後不得去因被獲咸淳三年臨
安尹潛說友以侯靈蹟炳著兼採其謠頌嘉懿聞於
朝請錫廟額謚號四年二月十六日降勅賜廟額曰
廣福追封侯孚順侯弟崇義孚惠侯崇信孚佑侯並
主興德坊土穀侯誕於六月九日墓在仰家橋章莊
配秦氏子繼芳弟孚惠侯配鄭氏子繼善孚佑侯配
衛氏子繼美皆從祀於廟有佐神曰張判官朱三者
亦靈異凡以水旱疾疫來禱者無不感應如響
贊曰漢世建常平倉誠爲良法美意後代行之不得
其人因緣爲奸名襲而實違恆致阻廢獨蔣氏以布

衣兄弟仗義力行如獲所嗜一境賴之可不謂賢乎
至其毀家紓難不求爵賞夫豈乘變徼功者比既歿
而封侯廟食馨香奕禩天之褒報陰德固然而侯復
眷眷斯人庶以昭貺濟人利物之心殆生死以之也
自明迄今祠經迭燬豈其靈或少替與然康熙癸丑
之災神像汗流兩頰趙中丞浚河之役不與羣廟俱
削實繇精爽未渝用克永祀或曰秀州亦有神祠日
昃始往蒞事所謂神之在天如水在地無往不至者
非與或曰宋嘗贈侯太師平章軍國重事右丞相魏
國公子疑其詞不類姑闕之其諸神怪事傳聞甚夥

亦不具錄徵信也

乾隆五年陽月里人田純撰

按文云或曰宋嘗贈侯太師平章軍國重事右丞
相魏國公子疑其詞不類此誤會宏治間潘君記
文也潘記有詔下封太師平章軍國重事右丞相
魏國公議賜有廟額封為平章侯子佑侯
云云攷魏國公為賈似道太師以下乃其結銜蓋
謂下其事於賈合議非以此官爵封神也惟賈身
任宰執不得云封疑潘記
封字衍誤或句有脫字耳



重建廣福廟記

明徐一夔

吾惟穹壤之間跂行喙息之徒苟其方寸之間一念所存純一無僞仰不愧俯不忤則其發見施諸明而無不孚達諸幽而無不格惟神奮起閭閻所爲不過如古貨殖家以市價爲術非有異於人也但其所存一以濟人利物爲心無有私意存乎其間故其生也惠被於一方而人德之其歿也福庇於後世而人戴之非僥倖於一時者所可致也若夫單夫細人以左右望而罔市利而惟恐不足者或過茲廟仰瞻肖像甯不惕然有警於心而不知所勸哉神降生之日一方

之人會享祠下以祈以報因作享神之詩使歌以祀

神詩曰

吳之山兮蒼蒼河之水兮洋洋有廟翼翼兮在河之
梁神之來兮不來目睽睽兮延佇或洽然兮以風或
黯然兮以雨俎有牲兮其牲既滌尊有酒兮其酒匪
酤胥蠶潛通兮侯食有所逐畢方兮其去無蹤驅海
若兮波濤乃東物不疵癘兮人不暴凶降福穰穰兮
我民攸蒙吳之山兮不改其色河之水兮其泚湜湜
於千萬年兮惟神之宅下民祈報兮歲歲其無斁

鹽橋廣福廟蔣侯碑記

凡廟祀之廢興視功德之有無苟有功德於時而能
保佑其民則人久思慕之其廟雖廢必將重建而復
興以盡報功之心其不然者反是此記功食報之典
今古廢興之跡歷歷可考也杭之鹽橋有祀蔣侯之
廟曰廣福自宋之元歷遭廢毀輒復興建再廢於我
朝天順間住持七寶寺僧行慶偕徒宗甯募緣而重
建焉宏治戊午歲杭境多災廟廢而神像獨存宗甯
復率其徒德誠暨孫如珍經畫重建輪奐一新前廟
棲神後為佛閣三層而居室左輔成厥功實沈鎮倡

義而珍力盡瘁居多予詰其廟之屢廢復興何功德以致之宗甯出蔣侯行述一冊稽侯兄弟三人當宋世居杭城長崇仁次崇義崇信皆敦孝友而好捨施凡遇歲豐米賤必出資儲糴歲歉則以初價平糶毛芥無過取且聽人持槩自量人亦莫能欺之咸嘉其惠稱爲蔣自量遠近飢者獲濟不可勝計嘗值大旱鄉人厯壇祈禱不應惟以蔣自量祈之大雨卽降咸謂德感所致宣和閒方臘聚寇陷杭蔣兄弟父子率衆拒寇赭山之陽英豪奮志勢挽滔天杭民賴以全治功聞於朝未及封報而天心罔測兄弟俱逝後杭

縉紳士民不忘其德復以事聞詔下封太師平章軍國重事右丞相魏國公議賜有廟額追封崇仁爲孚順侯崇義爲孚惠侯崇信爲孚佑侯命七寶寺開山住持僧世守其廟厯傳德仁師達妙蓮而至行慶之徒繼守弗懈將今數百千年而靈顯如故也自有廟以來杭城罹疾遇患者求之無不安旱澇災凶禱之無不應侍侯左右者其神曰張判官朱三者實相厥靈焉七寶鄰寺剏於吳越正明七年固侯之困址也并燬於火亦漸興復於戲據冊云然若侯兄弟者功德施於時靈顯著於後誠所謂其生也有自來其逝

廣福廟記
三
也有所爲侯雖死猶不死耳是宜後人思慕不忘興
建特易而衍廟祀於無窮也予亦有感而書之復爲
之謠使登其廟者有所徵信其謠曰

邦家啟運迪爲昌豈特麟鳳降禎祥
蔣氏兄弟誠爲良濟時功德何輝煌
身雖遐陟白雲鄉德遺身後名愈芳
是時疏奏達帝旁紫泥鸞雀來封章
兄弟後顯邦家光廟錫廣福號益彰
重建峻宇鹽橋梁飛葺畫棟參天長
吳山拱兮蒼蒼錢江遶兮洋洋控帶浙
越何軒昂邦人瞻仰何時忘

峇宏治辛酉三月吉旦平湖雪窗潘寔撰

重建蔣侯碑記

吾杭跨運河之上有橋曰鹽橋廟曰廣福神曰蔣侯
按輿記神生於宋之建炎家世積慶平糶賑民弗過
媒利每記鬻錢任其行槩人或多取歸而較之惟得
值數衆以爲神異自後莫之敢欺因有自量之名遇
歲大饑作飭餉貧獲生者不可勝計方臘之變神督
家人捍禦於赭山之陽賊莫敢犯杭人賴以保全有
欲上其事者神曰我爲國家効此絲力爾敢望報哉
羣議遂寢嘗語二弟曰人須存仁心行好事以垂隲
貺以布悠遠其仗義績善類如此歿之日遐邇奔號

如失所依而益懷之迺立祠於神之故居曰七郎堂者卽今之七寶寺是也一境祈禱響應咸淳三年京尹潛說友武學蔣文明奏錫廟名六年再請封謚侯以孚順孚惠孚佑之號咸淳末年徙祠鹽橋東北尹韓彥質又徙橋上卽今廟是也迄茲數百年威靈顯著瞻其像者猶足以勸善而懲惡悔過而滌新則其有功於後世有裨於造化豈云小哉攷之於禮法所當祀是宜廟食百代永奠斯土者也他如甯濤免溢反風息火禱薛榮之魄應甘霖之求仆文而滅其迹置木而償其貲者此特神之餘事安足侈邪宋五世

居此悉荷神庇感激於衷莫或自伸廟舊有碑毀於天順之甲申屢欲僭述樹石以記首末俾居民崇奉者知神之所自因語吾子禮部貢士方曰夫人生無益於時死無聞於後冥行詭跡弗克淑世者視侯甯勿泚穎乎方曰然是庸爲記俗傳六月九日爲神誕辰合境內外黔黎咸持楮漿致奠因爲謠使謠以侑之謠曰

粵昔鴻荒世初分偏者爲物正爲人形生知發理斯湮浩然之氣鮮克存末流浸失不可聞奇術相高悉喪真三廂豪傑造自興持危濟困力行仁深恩厚澤

廣福廟三殿靈神記
三
淡斯人潛敷默滲永勿淪於今在天爲列星赫赫聲
光耀九靈四方奔走各共誠絜醜泉陌來明廷豆登
雜進冀居歆肅然鞭龍下蒼雲我來薦歌達卣尊被
以金石從八音廟貌妥祀百千齡與天無極地無垠
皇明嘉靖十四年歲在乙未中秋日癸卯里人石邱
陳宋齋沐識石仁和李木書錢塘陶杲勒

廣福廟三殿靈神記

天下郡邑方隅之里里有社社有廟以一方司土之
正神而普護其羣黎焉夫此一方中神惟憑有土而
臨之則不致有天札疵癘以叢其害亦復無陰陽金
石以有其殃而且以勸善懲惡或示其幾於吉先或
遏其萌於未兆是以彰瘡之大權乃陰維於世法刑
政之外蓋厥任甚鉅亦猶之天官氏之有職方也不
佞在禮垣以病給假歸卜居於平安里適當東西兩
橋之中其橋梁如長虹蜿蜒下垂而相對蹲峙於泱
泱流水間河流夾岸生齒密湊豈非形勢之最善者

乎若夫古鹽橋者又架石橫空跨橋拓基築連雲之層閣奉三殿尊神坐鎮其下凡南北舟航銜尾至必頽伏斂楫而過若於神前崩厥角稽首者然不復乎尤稱希覲哉不佞初隸籍於神祠之下齋肅拜謁因考覈吾神於南宋駐蹕時世居蔣邨卽以神姓名村三殿者金昆玉友也各以仁義信命名立志醇良便非凡流故喁喁然與邨鄰相得甚歡而博賑廣濟以樂通其有無則仁心爲質猶鄭國僑之遺愛也持平市公以衡斷其可否則準義爲用猶衛史魚之鯁直也而又加之以賓朋酬酢社會燕享秩秩乎其不踰

矩矱抑抑乎以自下不矜一稟於禮讓爲先亦猶吳季札之謙尊而益光也由是合村向化陶淑日深圍範圍而日用不知於神之卒也村父老思慕之相率祠祀於其鄉而尸之祝之焉彼時宋度宗咸淳年間有觀風使者至採其謠頌嘉懿達之部又正值朱紫陽蔡元定兩先生力行理學敦崇實行之時遂奏聞朝廷賜謚曰孚順孚惠孚佑俱爲侯以主土穀有廣福之楔額夫生爲明聖歿爲明神振古如斯千秋不泯理豈或誣歟吾里歷宋元迄今咸荷三侯之帡幪安生樂業世享承平有絃誦儒雅之風無恃豪恣放

之習誠仁里也奉之者香炷嘗接晝而時獻牲牲醴酒以禱祀而求者大顯彰報受命如響侯之靈威於是爲不朽矣不佞方將聚國族於斯瞻望神庥正未有艾凡一切風雨旱澇兵燹搶攘以至災眚不有雞犬不驚何一非三侯之所軫念而護惜焉者蓋吾里百萬竈之蒙福邀庇豈尠淺哉啟誠敬於億兆永享祀於百禩鄉邦胥慶日月同輝故率爾爲是記以垂示於無窮云爾

嘉靖四十年歲在辛酉三月吉旦禮部都給事中平安同里周詩譔

鹽橋廣福廟碑記

里社三蔣侯之祠於鹽橋也蓋自南宋昉也古曰惠濟橋宋時鹽船待樵橋畔亦曰鹽橋去橋不數武爲興德坊相傳侯里居於此侯諱宗仁里人呼爲蔣七郎出家貲糴穀平價以救貧者弟崇義崇信承兄志踵而行之比其卒也里人卽其家立廟祀焉淳熙閒京尹韓彥質將徙建他所侯忽憑老兵言願徙橋南遂跨橋立廟今所稱祖廟者侯故祠也別於新廟後人因以名其巷云度宗咸淳三年京尹潛說友請於朝賜額曰廣福詔封崇仁爲孚順侯崇義爲孚惠侯

崇信爲孚佑侯嗚呼均是人也歿而爲神封侯廟食
意必有瑰意琦行足以驚世駭俗及今跡侯生平止
效常平良法以米穀濟鄉里淺見寡聞者必疑其不
副廟祀望以余考元胡長孺云宋趙忠惠公尹臨安
計會城見日食文思院米三千石又籍北關天宗
水門米船入四千石乃爲平糶倉二十八廩於鹽橋
北羅湖秀蘇常州米歲六十萬石悉以賤價糶焉竟
尹去十三年民忘凶歲且夫臨安當南渡時宗廟百
官之創立仕宦集於斯商賈百工聚於斯禁廂軍校
扈蹕移家作奸遊食者寓於斯仰給近州其粟易匱

獨是在官平糶十三年不爲不久一布衣兄弟相繼
垂六七十載卽或出入不能如在官之多而被其澤
者非其祖父卽其子孫時相告語今且歷年五百而
諺語猶樂傳之嗚呼南渡陵園誰憐麥飯而侯之廟
食不知闕幾興廢猶至今存也天之報施善人亦遠
矣哉或曰秀州有神祠曰昞方往蒞事或曰南渡時
世居蔣邨人卽以神姓名邨然祖父子孫宋尙書省
劄子耆老申呈甚詳先是嘉靖四十年里人周通政
詩爲文勒石康熙十二年廟災越七年庚申廣福廟
落成里人林璐復爲之記

--	--	--	--	--	--	--	--	--	--	--	--	--	--	--	--	--	--	--	--

三蔣侯祠記

馮景

天以生人爲心人以生人爲德故人能存心利濟誠於中而久於外乃天之所甚貴也生卽未膺顯祿而沒必爲明神鹽橋有三蔣侯祠侯諱崇仁宋南渡時人出家財糶穀平價以售貧者使人持升斗自量里人呼爲蔣自量云弟崇義崇信踵其志而行之比卒里人卽其家立廟以祀度宗咸淳三年賜額曰廣福詔封三蔣兄弟皆爲侯今且歷年五百而里人崇祀弗替人多疑侯生平無瑰意琦行胡獲報如是嗟乎三侯本布衣平糶周鄉里兄弟相繼垂六七十載所

廣福廟志 卷二
濟活人無算既誠且久可不謂至德乎哉唐時廣陵有李珣者以販糴爲業每斗惟求子錢二資奉父母凡升斗皆令人自量後百餘歲仙去又宋尙書張詠守成都夢詣紫府有黃兼濟者坐其上明日召而問之對曰愚無他善惟每歲秋收隨意出錢糴米俟來年新陳未接時糴與細民價例不增升斗如故詠歎曰是宜居我上也此皆生仁民而死爲神無疑也豈獨三侯哉豈獨三侯哉祠毀於火今新之惟景實生於侯之里今居又近祠里人日記之莫如子宜故記之

重建鹽橋蔣侯廟碑

列在韋布而力能埒於王公澤及一方面而法可通諸天下則蔣侯之平糴是也其歿爲明神廟祀血食以傳於永永也夫誰曰不宜昔人云救荒無奇策是不必救之已荒也古常平社倉義倉諸法言之甚詳此雖職司民牧暨縉紳士大夫鮮有爲閭里計者若素封之家富擬鄭卓比戶之中有無曾不以相卹勸之不爲動愧之不色沮至居奇者積粟盈萬千次亦不下數百石方災祲之是求持籌日計算聞價昂則色喜平則怫然有所不樂於心然不一二傳子若孫不

免爲溝中瘠矣孰若神之廟祀血食迄於今未有艾者哉甲子冬浙中丞趙公爲浚河之役凡跨橋而廟者咸毀之惟蔣侯廟哀然獨存夫世之所敬奉者二氏之教爲佛爲天帝其霸爽倍於蔣侯萬萬也功德及於民雖不可考而知然敬事之以庶幾其庇佑我者又甚虔且信也然獨蔣侯之廟哀然存者於是知趙公所以愛民之意冀長養而厚其生者蓋於是爲獨至矣夫平糶之法非特一方可行也然職司民牧縉紳士大夫有能行之者乎天下之大自郡邑以逮鎮堡有能行之者乎使一方之中有一人焉不憚舉

行之推而至天下郡邑之大之遠將饑饉可以無憂卽古常平社倉義倉之設不是過也今常平社倉義倉諸法史冊傳之不衰而侯之惠澤舍里社外鮮有能道之者若并夷其廟焉其何以爲勸廟之建始於宋度宗咸淳三年賜額褒封迄今幾四百歲燬而更新者數矣茲浚河之役廟能獨存雖趙公之意亦豈非侯之霸爽不自泯滅以得無廢祀也歟侯世居西溪今蔣村以神故名祠有二在巷者曰祖廟以別於新也曰鹽橋宋時榷鹽橋下故也謀伐是石乞某書其事者里中紳士耆宿某某也侯之封爵姓氏載在

故碑於戲侯之神且與吳泰伯季札伍員爭烈矣時
康熙二十有四年八月十有七日

鹽橋廣福廟記

蔣侯在宋宣和閒於赭山捍寇且平糶濟人功著朝
野德被生民鹽橋其產地也歿祀茲土屢傳靈異嘗
考宋牒當嘉熙咸淳中一耀旌於橋上現像於雲端
弭火災而頓息救民命而復甦爲國忘家利人舍己
封侯廟食五百餘年至萬曆己亥年被燬仁和縣主
喬公捐俸助建侯祠而喬公生像猶存至康熙癸丑
秋祝融肆虐而侯像汗流兩頰萬目昭然時縣主佟
公捐俸給示勸募里人亦不忍侯一日失所憑依爰
是鳩工庇材衆力齊舉不數月而告厥成功至大中

丞趙公濬河清橋因侯生建巨功歿佑斯民故獨存侯祠并題額記豈非其功德有不可泯滅者歟謹爲之記

康熙二十四年歲次乙丑仲冬月里人沈佳撰

重修鹽橋廣福廟記

原夫上天生民莫不欲使人人各得其所而歲運不能
能有豐而無歉不幸災祲見告在有力之家猶能自給
若乃編氓下戶往往家室不保甚至流離轉徙以阡於
死亡此亦氣數之無可如何而有仁人出於其閒不憚
竭財發粟以濟造物之窮其生也爲德於鄉閭其歿也
列祀於廟社揆諸禮經所載捍災卹患之義於以奉明
禋而昭美報誰曰不宜會城平安里跨鹽橋之中其上有
廣福廟以祀蔣侯兄弟之神神生宋建炎閒伯曰崇仁仲
曰崇義季曰崇信世居杭之

興德坊仗義好施嘗以家貲糶穀貴入賤出以濟貧者遇歉歲輒不取其直沒齒不改兩弟仰承兄志行之數十年率以爲常遠邇之蒙其利賴者不可億計卒之日里民立祠祀之歲時祈禱有感必應咸淳初官請於朝賜廟額曰廣福封神以孚順孚惠孚佑侯號淳熙閒臨安尹徙祠橋上今之俯河流而傑然稱嚴翼之觀者固其址也神靈爽昭灼載之紀傳未易悉數歷宋元明迄今數百年藉庇神庥環而趨謁祠下者互晝夜香火不絕祠屢燬屢建康熙癸丑秋復毀於火里人各捐資以建落成大槩而後殿室宇廊

廡之屬日久就圯往時廟門之外列於西者有紙爐以供焚燎植於東者有揭竿以懸神燈近皆仆壞不治於是里中耆彥章炳儒田維垣等慨然念吾儕之徼福於神者至渥而忍令榱桷不完規模不備何以彰胥蠻之靈而慰祈報之意因首倡捐貲偕衆信各出貨泉以相厥事鳩工庀材一切復還舊觀父老士女靡弗欽仰踴躍炳儒等恐無以昭示來者爰謀爲文以記之嗟乎神生宋季與同氣皆布衣耳非有列爵之貴鐘鼎之富也乃能行惠於鄉迄終身而弗倦由是以其溥施濟於生前者炳神功於身後消疵癘

之災息風烟之警雨暘以時沴戾不作無非體上天
生民之意以嘿贊元化宜乎民之敬共明神更千百
禩而未有艾也然則廟制之重脩其工曷可已而衆
姓之協力以歲事者其勤又曷可泯哉至於助施諸
姓氏及營繕財費若干與夫落成歲月具載如左文
不備書


雍正七年己酉二月望日里人趙沈堯漁玉沐手謹
記

蔣侯廟記

吾杭鹽橋蔣侯廟香炬極盛賽禱最靈爲城中里社
冠昌耳食旣久比卜居祠西凡有誠求洞見至隱如
所欲出尤聳然致敬焉因詳考侯生平行事乃知其
沒爲明神備彰靈異者實有由來非尋常功德可比
今夫忠臣孝子標奇節樹顯名者悉本天地剛大之
氣而愚夫婦一時激烈亦有能之至於溥施利物損
己益人受者有實際施者無矜心疊疊終身不厭不
倦無所爲而爲之非仁心爲質克己功深者詎易臻
此如侯之持平糶糴惠濟飢民聽人自量毫無計較

廣雅
兄弟三人同心濟美歷數十年如一日且捐貲捍寇保障鄉邦冒險不避功成不居處闖闖中日行聖道舉厚實名高之念消融何有上下古今洵所僅見且夫常平社倉諸法本無遺議特奉行未善拘牽文法奸胥豪吏因緣中飽出入之間弊竇叢集賑貸引領往復需時前人惠政徒成故事有心者恆歎息焉侯無民社責而日爲里閭籌升斗圖存活法良意美造其門者皆愜心無推解之名有利濟之實布衣積善爲造化補缺陷爲王政補偏弊言有大而非誇者此也使人盡存侯之心行侯之事公平相與許欺不設

仁讓於是興兵刑於是靖舉而措之何施而不可迄今壘斷細民有增減量衡私自便利者法不能禁一語以蔣自量之名則慙然慚阻顙若有泚其化人之深若此崇茲廟貌爲百世人心風俗勸者良非淺鮮又况返風滅火捍海迴潮一切禱求其應如響侯之靈蹟彰於身後更有嘖嘖人口者哉昌藉庇旣深景行尤切誦颺實事非敢阿所好也謹記時乾隆五年孟冬月里人邵必昌敬撰



鹽橋廣福廟碑記

鹽橋廣福廟妥宋蔣侯崇仁崇義崇信之神報祀不
忒其來甚久廟之建自侯故里興德坊始其徙置橋
上則宋淳熙迄今六百餘載歷有傾毀里中耆艾輒
相與振而新之維持於弗墜稽古祭法法施於民以
死勤事以勞定國能禦大災捍大患則祀之匪是不
舉按侯生平慷慨樂施予歲豐出資儲糴歲歉取初
價平糶聽人持槩自量無所較計特鄉里善人好行
厥德非有奇績異烈震耀百世也而廟貌翼然大小
稽首余用是知善不難爲末世人情之易爲德抑有

廣福廟志
吳
故焉糴粟者匹庶之事非有國家者之務也其或權於多寡贏縮之故如常平義倉和糴諸法亦曲爲貧民補救非征利富國之籍也沿襲既久當事者浸失古意於是有侵漁之弊有強配之擾有取足於下歸羨於上之誅責其究也官日益增商日益壅而粟愈貴民力愈耗且不勝其厲若侯所爲亦常平遺法耳勤勤了了豈期務於博濟而侯兄若弟行之數十年遠近沾溉至於今且樂道其嘉惠不置天下有當事所難爲匹夫爲之甚易有匹夫願力所被倍益於當事之措施無算者則卹人之隱有至與不至而一身

之利有熟計有不屑計情事之相懸不可以同年論也世又傳侯宣和間拒方臘於赭山父子兄弟相率毀其家弗顧夫有卹人之仁斯有見義之勇志行之素定不足爲侯難然其事亦足媿疆吏之廢職且長寇者嗚呼一介之士心存利濟於物必有所裨侯其可睹已秉當事之權撫待澤之衆卽事有掣肘豈遂無術以處過侯之宇其亦惻然而動心矣乎歲辛酉陬月里人繕侯廟旣竣請文於余用述侯之德系以樂神之歌其辭曰

維橋之下河水瀾瀾流神慈兮亦有估舶吳杭越稻

上下於茲兮糴賤販貴估豎之事分則宜兮官倉之
粒積而不涸如坻如京兮謂爲存救圖歉於豐法甚
良兮悲哉窮閭歲豐亦歉奈此官倉兮嗚呼侯兮虞
災儲蓄惠及通腸兮操斛持量匪我則有廉以平兮
飫神之賜陳詩合樂報以不忘兮我牲旣效我酒旣
載神其樂康兮俾我鄉邑斗穀視上乃終有慶兮
廟自宋至今不可謂不舊矣而碑碣無一存焉大
率屢燬於火之故里中好事者嘗集侯行實一冊
止載咸淳年封牒一道明人碑記數篇皆不知名
之人 本朝康熙初林璐爲之記亦未見石刻近

閱王曾祥文集有廣福廟碑記蓋乾隆辛酉重修
時作冊竝失載則知宋元以來名迹散佚無考宜
也王記距今又六十年廟中香火逾盛橋東西市
塵鱗次按日率錢并遠近善信施捨不絕拓廟宇
修蔣村神墓獨無碑記以傳永久可乎余故爲補
書一通俾董其事者壽之石時嘉慶五年歲在庚
申閏四月之望

賜進士出身

誥授奉直大夫

日講起居注官

翰林院侍講里人梁同書謹識

廟向存碑材二不知所始當是乾隆戊子廟燬後

廣福廟志
里人思刊復舊碑之所置也越三十餘年庚申夏
予書此碑遂徙碑石於刻工所刻未竣而辛酉正
月三日之火廟復被焚此碑獨得免於災幸也豈
亦有數存乎其間邪抑神之靈實呵護之邪不可
以不記因補書其空處時歲在壬戌八月廿又六
日同書年政八十


廣福祖廟鹽橋廣福廟社神蔣侯記

謹按神本姓蔣兄弟三人七名崇仁八名崇義九名
崇信世居於河渚蔣村以力耕致富粟米平價之時
出資儲糴如遇歲歉米貴則以初價平糴分毫無過
取且聽人持升斗自量人亦莫能欺之遠近飢者獲
濟不可勝計咸稱為蔣自量云今之興德坊古名七
今名祖廣福廟者即神故居賑施平糴之所稱之日
廟巷廣福祖廟木本水源不忘所自也宋咸淳三年奏錫
廟名六年再請封諡侯以孚順孚惠孚佑之號咸淳
末年徙祠鹽橋東北蓋推神意所依棲吾欲跨橋立

廟憑老兵言之甚悉不過假力於人爲以廟食於百世也鹽橋廣福廟并祖廟在興德坊者屢燬於火而里人屢新之七寶鄰寺創於吳越正明七年固侯之積米困基也所以司香火廟祝乃以七寶寺僧爲之清乾隆五年里中社友買舟河渚直泝蔣村瞻拜神像其村卽以家廟爲社神每歲正月初六以後上元以前報賽者無虛日香火頗盛且當面有放生池亦稱廣福廟云詢及蔣氏後裔乃得侯之墳墓巋然三塚葬於錢塘縣欽賢都垂字號內有人傳禾中巨室某在省終年訐訟不休乃默禱於侯曰儻得訟結事

了願在禾中立廟而祀焉及至事完而所禱者已忘一日見侯兄弟三人儒冠博帶直入巨室之家倏時不見頃有舟子登岸索金云是載三人來者於家中檢得緣簿蓋卽昔年所立之願而侯陰遺於其家者也於是巨室乃在嘉興水西門立廟虔奉三侯神像此卽先伯鹿菴先生記中所云秀州有神祠日昃方往蒞事之說也善恐日久湮沒無聞故於各傳記中彙括其大略若夫三侯兄弟仁心好事縣志載之詳矣其事蹟靈異著見頗多茲不復贅

乾隆六年四月仁和弟子林繼善齋沐拜記




鹽橋廣福廟記

從來天之眷顧在德天視自我民視又聞德惟善政
政在養民其德厚者其流光其淵深者其源遠操是
以衡量古今之廟祀神靈大抵錙銖不爽者也若廟
留泰伯社亦名欒甯不可省乎吾杭鹽橋廣福廟者
里人建以祀蔣侯也侯諱崇仁弟崇義崇信世居橋
西興德坊家頗饒攸好德事有利濟於里民者不惜
捐貲施惠嘗出財貯穀立法平糶不貪名不責報不
屬於官司閭胥意美法良垂之永久侯歿而弟兄遵
守數十年閒遇水旱凶荒不一而足杭城煙火萬家

藉侯之平糶穀以生活者奚啻百萬生民則侯之德莫尚矣嗟乎彼析人之珪擔人之爵苟有功於民社亦臣分之當然天猶榮其身昌其後終美譽於兩閒若侯之在宋世無尺寸之階半通之綰假令視災黎於膜外亦何責乎爾乃侯獨戚戚焉痼瘵一體布置周詳不特一時賴以生而且奕世享其利噫德洽於民則受天之祐矣宜於度宗咸淳閒詔贈孚順孚惠孚佑侯寵顯名於身後魏輩革於通都迄今春秋禋祀歷千載而不磨豈不以侯之德在羣生爲上帝保赤子乎當咸淳前里人感其德先已卽家立廟今號

爲祖廟者其故里也淳熙閒跨鹽橋建祠其新廟也橋東西爲杭人士及四方冠裳往來肩摩轂擊輻輳祠前想侯之德仰侯之風思南宋朝紳無寸善可錄而汨沒不傳者豈不大相逕庭哉况西山之河渚閒有蔣村村中人皆蔣姓鱗鱗屋宇子孫千億爾熾而昌又豈廟食一方而已哉嗚呼撫今思古慷當以慨乃爲之頌曰奕奕寢廟輪奐堂皇妥侯之靈而安而康黃童白叟禴祀烝嘗緬侯之德流水同長
乾隆六年四月仁和弟子鍾鏞拜撰



蔣侯廟記

鹽橋古蒲橋也其上有廟翼然跨河而起祀宋蔣侯兄弟世所傳蔣自量者是也侯生於北宋其立廟在南宋之季閱今七百年廟屢燬屢建而侯之封號日益崇士民之祈禱者日益衆歲時令辰廟內外肩摩袂交歌舞之聲恆不絕於耳咸以為侯之靈應宜如是也夫禮云有功德於民則祀之又云能捍大患則祀之侯之平糶歷六七年之久其功德至大矣睦寇之興侯拒於赭山之陽而闔境以安捍患更何如乎竊謂人生世上無論窮達果能存心行善竭己之

慶曆厚志 卷六
才與識而利物濟人不留餘力務使世之有藉於吾者皆得滿其意以去聖人所謂達人之功不外乎是此其意卽可以享廟食而著神靈至於侯身後祈求之應驗靈威之昭顯雖復赫然在人耳目要皆後焉者矣嗚呼天之報施善人未嘗或爽若蔣侯者豈非其明驗歟丁亥秋里人醵金以新侯廟並鹽橋而亦重建之旣竣事乃屬余爲文余固喜諸君子之敬共明神且樂舉侯之善與侯之所以成神者爲當世告也遂不辭譎陋爲之記

誥授資政大夫湖北布政使里人費丙章敬撰並書

恭頌鹽橋社神蔣侯歌詩

炎宋末造世雲擾兮吳山駐蹕屯億兆兮紅塵回而翳昏曉兮天降英傑濟萬靈兮翩翩三鳳骨皆青兮孝友任卹垂典型兮旣捍江城走羣醜兮復賑飢氓施所有兮平價而糴行永久兮明魄上陟侍帝旁兮精氣昭鑠眷故鄉兮靈胥警伏回祿藏兮呵禁女魃無驕陽兮鸞書螭版崇廟食兮賜爵列侯配社稷兮此邦之人惟侯殖兮苾芬祀事酬遺德兮有肴盈俎酒盈瓢兮迎侯之來蜺旌飄兮送侯之去吹洞簫兮工歌巫舞擁市橋兮神宮肅穆永不祧兮

昆友聯翩絳闕朝凜然猶復想英標青溪膽落游氛
散紅粟膏流道殫消風颭靈旗回巷陌雲騰寓馬出
河橋祝融旱魃都降卻燈火祠宮奏玉簫
乾隆五年桂月里人厲珩拜撰

重修蔣侯墓記


蔣侯崇仁墓在錢塘縣欽賢八都垂字號內侯與弟
崇義崇信同葬處也按志傳侯宋宣和閒人先世居
西谿以村中皆蔣氏名蔣村其後徙城內之興德坊
侯生焉值方臘亂陷睦衢歙等州將寇杭侯散貲財
募義士力拒於赭山之陽賊不敢犯賊平有欲上其
功者侯堅謝乃寢高宗都臨安居民填溢食米不繼
侯預籌備荒之策乃做常平倉法廣糴米穀固貯之
歲歉則如所糴之數糴於市秋毫無所羨其他施賑
之事甚多侯沒崇義崇信胥踵行之里人感其德卽

侯故居祀侯淳熙中更立廟於興德坊之鹽橋卽今所稱鹽橋蔣侯廟是也而墓遠在鄉僻凋零久不治比者甚將去其封樹而售他姓掘之深三尺許下皆青石鱗次斯之以斧煙壘出眇衆目遂止城中父老閱之僉曰侯有功德於吾杭墓曷可廢爰醵金鳩工而加保護焉先是邑人梁侍講同書旣書王曾祥所爲鹽橋廟記礮石立碑於廟復以墓之重修也屬余記其事嗚呼方侯之旣沒也會江潮嚙岸勢洶湧沿江民禱於侯廟潮漸殺旣而臨安大火逼鹽橋忽雲中見蔣相公幟號火亦熄相公者民之所以稱侯者

也侯之靈異不勝舉宜啟其墓而侯益著其靈歟夫怪與神皆孔子所不語然神依人而行先王緣之以設教往往默示感應用警夫蚩蚩之氓而崇德報功國家著爲令典杭人於侯隆其廟祀而又懃懃於侯之墓亦以見杭人之義焉是皆可書時嘉慶五年七月十八日

誥授通議大夫浙江等處提刑按察使司按察使總理通省驛傳事務無錫秦瀛譔

賜進士出身 誥授奉直大夫 日講起居注官翰林院侍講里人梁同書書




彙刻廣福廟碑記說

古之有功德於民者不必以文重未始不以文傳傳其文斯傳其人而功德遂炳千秋而不泯吾杭蔣侯之祀於興德坊也自宋而元而明於今幾六百年矣上自薦紳先生下逮販夫賈豎莫不奔走禱祀崇奉敬信非功德在生民曷克有此而閭左之人僅傳其自量一事或且託於鬼物以神異其說竊嘗疑焉及考志乘得侯顛末蓋所謂自量者初非如沽釣名譽者流捐已財以矜耀於一時直以利濟為懷渾忘物我如古仁聖賢人之用心而且捍大患禦大災其存

其歿皆有惠澤及人殆歐陽子所云生而爲英死而爲靈者歟侯之獲祀茲土也豈偶然哉而吾因之有感矣方宋都臨安與侯同時之輩富貴赫奕者不知凡幾至利人濟物曾不聞有人焉爲涓埃之捨而布惠行仁歷終身而不倦者乃在三布衣迄於今彼富貴赫奕者直爲電掣煙銷閭巷之人莫能舉其姓氏而侯之廟貌常新巍然於河梁之上四時祭告無虛日則善何不可爲而爲善亦何不樂哉乃世之算錙銖者方且鏤心刻骨刻剝以肥利其子孫而不顧是曷不以侯之事告之侯之行略載在宋牒者甚詳元

明來亦代有碑記特是兵燹焚毀風雨剝蝕無復存者人罕能舉其槩里中同志懼其久而漫滅且侯之事可爲世風惜不家喻而戶曉之爰取前賢藝文哀集成帙付諸剞劂氏俾人人知侯之所以獲祀茲土者非偶且見善之可爲而營營於利之徒勞也不然侯之功德在生民不必以文重又奚事區區者爲
乾隆六年二月朔日仁和張琪肅拜謹書



鹽橋廣福廟社神蔣侯傳記誌言

予諷誦蔣侯牒傳碑記慨然於古仁人之事業足垂不朽而知直道猶存人心不泯也禮云能禦大災則祀之能捍大患則祀之以生有功德於民者歿不忘於人心祀所以報也侯之賑施拒寇非禦災捍患歟其祀也固宜特是人知侯之德不可忘而不知繼其志述其事爲真能不忘也使徒博而犧牲豐而簠簋祝修吉化樂奏雲璈其於祀禮則善矣而嘉言懿行弗克遵守侯其許我乎果能是則是倣勿替引之縱所行不符一轍而功德足及生民即可嗣音媲美斯

廣福廟志
真爲不忘於心雖禴祭神享矣且侯布衣也懋遷化
居不自菲薄而爲國愛民兄弟競爽業建於當時聲
施於後世非規規有所師法者而功成名立如此豈
後之人奉其繩尺反艱於措置邪卽時勢或殊未容
踵武苟見善卽爲無分小大饒者不惜實力窶者
贊空言不皆爲賑施拒寇之事而罔非賑施拒寇之
心其於濟人利物豈有異哉嗟乎侯之後繼起者鮮
聞而予顧沾沾屬望如此誠以牒傳碑記更相傳述
而不倦者皆直道猶存人心不泯之一證也想侯當
日惟知存仁心行好事故功業足垂不朽今人慨慕

古人更能傾心師法所謂祖作而孫述者絲延不絕
矣福之廣甯獨在侯之昆季哉侯之里居事蹟封號
靈爽前人之述備矣茲不辭費感而書此行以自勉
且云勸也

乾隆六年歲次辛酉仲春月望日里人葉維新天敷
謹誌



鹽橋廣福社蔣侯碑記書後

自古有功德於民者其生必胙之以土田死而廟祀
千載蓋大較矣顧豐功駿烈類皆出於王侯將相暨
夫賢聖仙佛而閭巷之士側身修行積功累仁者不
與焉何也事恆而願平無驚世駭俗之舉照耀遠近
祇務期盡乎所當為與得為而後已若廣福廟蔣侯
固其一也侯姓蔣諱崇仁昆季三人居杭城鹽橋宋
之右三廂界卽今之義和里也富而嗜義建倉以貯
粟平糶以濟貧自赭山捍寇外前誌有自量可怪之
語識者勿取唯是就其一節概其生平無非以立達

之心廣施濟之術者夫俗之媮也忠厚長者之行相
戒勿事壺飡德色推解拂容鄉鄰升斗之需猶且難
言而况惠及邦國之大且義社倉法唯帝王積貯始
克有之然行之未必盡善卽善矣未必永久侯當青
苗斷削之後花石騷擾之餘哀鴻遍野幾靡孑遺所
謂一介之士苟存心於愛物必有所濟是以一手一
足經理其閒幾及百載東南之民益動而巽日進无
疆抑何久且大也世之人竭蹶畢生但計目前不規
久遠猝遇閭閻水旱凶災貧者轉徙流離富者袖手
旁觀若秦人視越人肥瘠勸勉者競以無力爲解暴

棄毋乃實甚若侯昆季三人行人不肯爲亦行人不
必爲仁心善術表表千古殆與呂祖之念五百載後
人大士之渡盡衆生方始成佛者殊途而同歸與予
先世居祖廟巷依庇神祠者迄明季而盡弱冠後出
入會城瞻拜殿廡徘徊愾慕每欲竭其所見聞發侯
之大節而涓滴不能益滄海之深坏土不能增泰岱
之崇慚赧輒止適里中同志彙刻侯廟碑文不揣荒
蕪頌揚數語綴諸卷末亦以見古今來豐功駿烈大
抵從質實地起而有志事成卽王侯將相賢聖仙佛
皆可例觀也俎豆勿替夫復奚疑

乾隆六年三月朔日杭郡弟子高烈薰沐拜手

讀鹽橋廣福廟蔣侯碑記書後

濟人利物惠澤歷久彌深捍患禦災祀典於今勿替
理本可信事更足徵初非侈金碧之美觀實以薦馨
香於明德也嘗稽邑志載讀廟碑棚橋而下巷號七
郎之堂鹽橋之上祠肖三公之像門開蔣徑庭植田
荆克副嘉名率先居乎五德徧詒多福遂廣逮乎羣
黎禱同枹鼓之應聲封竝土茅之列爵迄今追思往
蹟敬仰豐功過興德之舊坊入平安之仁里見夫一
水波澄雙虹彩落其閒肩摩轂擊者放愚當年告糴
之人飛翠流丹者密邇昔日自量之所於是比閭安

堵不聞烽火之驚鼓棹中流無復鹽潮之患揭竿高
轟恍來風雨旌旗甘澍頻施奚假犧牲圭璧宜乎香
花寶蓋夾道而馳籥翟笙歌無時或斲也林近依祠
宇備沐神庥辱給諫之後賢示里人之新刻誦經三
復綴以一辭昔子山之銘張寺僅繫意於虛無卽樊
南之賽北源尤乞靈於渺小孰若德被兆民益可文
垂千古歿而祭社楊少尹不愧斯人神常在天韓文
公猶生此日

乾隆六年歲在辛酉二月朔日里人徐林薰沐敬書


鹽橋廣福廟蔣侯碑記書後

傳稱不朽有三而立德與立功爲之先顧德與功之
立大都藉有爲之勢居得爲之位而後可以澤被民
社聲施無窮乃若有宋賜額加封蔣氏三侯者身列
闈闔之中心邁廊廟之上遇國難則以家財佐軍捍
禦巨寇遇歲歉則以私儲平糶存活羸民是豈有尺
寸之權土地之寄者惟以不忍之心行乎其所不得
不行而當時賴之後世思之以視食君祿而苟且貪
生膺民社而膜不知恤者其相去何如哉余先世世
居仁和之興忠里與侯廟祀相距無幾恆慕侯功德

心切嚮往乃以蚤歲奔馳南北瞻拜未遑而里人戴侯之德隸侯祠下者咸思得播侯之故蹟傳之不泯將舉前代之碑文傳記付諸剗剗嗚呼諸君之心遠矣而侯之功德愈長矣夫世不乏向善之子特以阻於位格於勢畏縮而止耳使知侯之所以廟食至今者出自編氓不藉權勢盡人可爲亦盡人能爲惟存心於愛物而不惜其力不吝其財卽富貴不及於身而顯揚自昭於後誰弗願聞侯之風而興起者乎嗟乎自宋迄今世代屢更矣而侯之廟祀至今如昨且能使數百載以下之人感其德者如同身被是非有

不朽之精神貫注於其前又烏能使不朽之人心奔走於勿替哉余向慕夫三侯之賢而更有感於諸君子之風因綴數言以垂厥後

乾隆六年三月仁和高瀛洲敬跋



廣福廟紀事

廣福廟祀蔣侯垂七百年靈蹟響應志乘爛然奚事贅紀惟神功之昭著

聖恩之優崇以及憲司祈福士庶禱祠歷久彌新於今益烈恆九耳熟舊聞力襄盛舉不揣陋劣用陳其槩先是乾隆癸丑閒張希賢林永順金士三捐修鹽橋築福清巷戲臺歲時令辰有所酬祝而吳聚榮梁紳書暨恆九復葺神墓建坊表碣加崇宏焉嘉慶辛酉鄰火不慎廟忽延燎里社各輸悃忱朱寶川蔡廷蘭等醵金繼之庀材鳩工重新廟貌增建木場巷之

樂羣堂上翼臨暉閣崇奉神之先德甲子歲比不登
四民詣祠環禱浹旬海陵之粟至逾萬斛市值頓落
咸感神佑撫部阮公獻額曰常平民食乙丑奉

旨清查各省祀典禮部咨浙紳士孫芝蘭樂熙等合
詞牒縣申詳府藩轉詳撫院清具題蒙

恩准加封號曰廣濟利濟靈應丙寅四月四日肅儀
郊迎

綸音以紀曠典己巳正乙嗣教五十九代大真人張
莅浙採訪神蹟五月二十六日恭詣

玉闕奏晉王階敕授總督全漕統轄四瀆之職壬申

糧儲道慕公糧艘北上得占利涉酬額曰誠孚忠衛
杭嚴衛游公酬額曰同心利濟癸酉紳士張鑒等呈
請撫部李題咨准仲春仲秋中壬日印官致祭鹽糧
衛三署崇奉香火又以歲修需費米商請示捐輸普
濟堂公款內酌濟廟工蔡德潤丁燾等議請俯順商
情准每年提銀百兩俾資歲修他處社廟不得援請
通詳立案廟之西列紙爐其東植揭竿爲何又瞻沈
元均捐立樂熙復修豎之每屆朔望上懸旗燈以壯
瞻矚道光甲申歲大饑里紳就廟設粥廠助賑是秋
大有中丞帥公獎題額曰善人是富衆卽歸德於神

敬懸行殿丁亥橋又損林永順徐公儀倡捐多資衆
商踴躍爲助採石砌築飛虹重互並新神祠里紳費
丙章撰文記之庚子秋定海有警辛丑浙東震恐省
垣戒嚴里人咸集神廟助義防範城郭賴安癸卯事
定閩浙總制劉公題額曰任卹可風懸之樂羣堂上
要皆神之感庇也七寶寺本神之囿基自乾隆戊子
燬後規模漸復嘉慶辛酉又火廢爲榛莽住持守成
年老退休甲戌秋集商吳聚榮暨恆九延僧眞覺名
浩然進院清理越三載啟建大雄寶殿及六游堂龍
象莊嚴頓復舊觀其徒法全徒孫本源與李在明咸

有力焉昔乾隆辛酉修廟之役僉以神之行實載在
牒傳碑記嘗彙刻以風世今去辛酉又將百載樂熙
呂聲大暨恆九謹將 加封疏咨各稿近時祠墓碑
文先後付刊以續舊刻茲於卷末牽連紀事用昭神
貺其所闕略俟後賢補正云爾
道光丙午季春望日里人唐恆九謹誌

Blank page with vertical lines, likely a table or a page with very faint text.

右廣福廟志一卷今就乾隆道光初續兩刻粗加增
香本也申世居神里昔讀廟碑梁學士書後云有
宋牒明碑載侯行實冊中心竊識之顧求之十年
弗得也會城庚辛粵逆之變焚殺黷蹟近古未有及
甲子事定侯廟巋然一日見魏子佳表丈手一冊
將錄副視之為乾隆辛酉里人修廟時所刻牒傳碑
記其後

加封疏咨祠墓新記則唐丈恆九集同志續刊在道
光丙午歲審知乾隆初刻即舊所稱行實冊也子佳
云某夜守廟者夢字籠中霞彩騰起炤耀殿隅詰旦

檢視得是冊洵神之靈爽昭示歟卷末唐丈紀事
篇頗覩敘廟中故事今謹增入咸淳以下志乘數則
胡徐馮傳記三首冠以

欽定大清會典都鈔一帙授之梓人題曰廟志志者
識也庶幾省遺忘免散佚爾如春秋官祭繕修歲輪
及廟基墓域犖犖大者尙當詳稽官牘類纂舊聞俾
就條理以垂久遠茲固非定本也

光緒三年丁丑夏六月里人丁申謹識

福州吳玉田鐫

